

乾隆淮安府志

淮安府志卷之二十二

儒林

史漢俱有儒林傳蓋遭秦滅學伏勝高堂生之徒各抱遺經授諸弟子爲世大師後世遞相講授自有宋程朱出乃始撥棄訓故專求性命而所謂儒者遠過漢唐至象山陽明則求之於心學雖高而其門益多途去聖道漸遠今日之所謂儒林者大抵規行矩步裁冠博帶服行程朱之遺言而以從事於經學者爲粗迹要之皆孔孟之徒也太史公有言雖不能至心竊嚮往之其今日儒林之謂矣志儒林

晉

陳邵字節良東海襄賁人郡察孝廉不就以儒學徵召  
爲陳留內史累遷燕王師撰周禮評甚有條貫行于  
世泰始中詔曰燕王師陳邵清貞節靜行著邦族篤  
志好古博通六籍耽悅典誥老而不倦宜在左右以  
篤儒教可爲給事中卒於官

明

岳薦字西來山陽人崇禎中諸生家貧事父母惟謹以  
哭親故得羸疾喜讀書淹貫百家每語人曰聖賢精  
微盡于六經四子書其尤要者在大學一編耳由是

以踐履爲實學以體認天理爲根柢矩言楷行雖盛暑中衣冠動止秩如也同里劉昌言延之教子專用宋儒程朱之學爲準偕昌言之官岑溪岑故僻壤睥睨缺壞守陴者無一人薦一日與昌言周視城垣勸昌言請兵于郡并相其卑薄者增築之衆譁以爲過計未越月鄰盜夜薄城守者發礮殺二人賊乃退明日視之正新增築處也其智略又如此

吳璜字姬望山陽人父安邦以行義推鄉里璜生而穎異少長工詩文聲名籍甚及改革之際奉父避難流離浙江山中事定歸鄉隱居涇澍讀書學道不復與

世事晚而注易晝夜玩索不厭往復有未解卽屏息苦思面無人色著易求一編推闡名理觸處脗合江右易堂諸子見之曰斯文不墜賴有斯人子晟進士別有傳

郭允觀字海日山陽人崇禎中庠生少卽究心性命之理謂聖賢可學而至舍居敬窮理無以爲入德之門于是操履端正色笑不苟授徒時雖甚暑不衣冠不見甲申後棄諸生不應試隱居城東鳳谷邨足跡不入城市晚年精心學易著剝復否泰論謂天地之生氣不厚于春而厚于冬不亨于一元來復之初而亨

于重陰剝極孤陽不食之碩果于國亦然于家亦然  
故曰否終則傾惟大人爲能休否昏德者方淫心驕  
氣以自泰于國家全盛之時而泰已不可保識者卜  
其蠱而將亡又著尚論篇經世策辨志論凡數十萬  
言上下千古議論卓絕卒年七十六

國朝

閻若璩字百詩山陽人順治中諸生少時資性頗鈍讀  
書至千百過十五歲冬夜讀書有所礙憤發不肯寐  
漏四下堅坐沉思筆研皆凍有頃心忽開如門牖洞  
開屏障壁落一時盡徹自茲頓悟異常于九經諸史

註疏百家皆能倍文暗誦綜核貫穿略無遺漏尤長  
于考據抉摘謬誤援引根證實能發先儒所未發康  
熙己未舉博學宏儒罷歸時

憲宗皇帝在藩邸召璩館府中未幾卒所著書有四書釋  
地釋地續再續三續孟子生卒年月考重校困學紀  
問續朱子尚書古文疑叢西堂古文百篇尚書古文  
疏證釋地餘論等編

顧諱字在瞻山陽人康熙中拔貢生授內邱縣知縣幼  
從父宦定海使從學于鄞人陳錫嘏錫嘏嘗受業于  
黃宗羲宗羲又劉宗周門人也學有源本遞相授受

謾因錫嘏遂爲黃氏高第弟子歸來抗顏爲講師窮  
經讀史與諸弟子盡日夜不休某中丞巡撫貴州延  
謾居幕內贊修王陽明龍場書院招士人講學其中  
歸里後又集諸子弟講學徐節孝先生祠與席者常  
百餘人及蒞內邱未滿一載發粟減糶不待報輒行  
勸民雜種棗栗以備歲荒事才有緒未及竟而病歿  
石岱峙字霞舉弟華峙字紫嵐大河衛人皆諸生父可  
璽早世二子奉事寡母督學甚力長而文章行誼見  
重一時邑人交口稱二石先生岱峙姿稟純篤而好  
講良知之學然未嘗厭薄格物爲徇外支離華峙謹



守程朱家法窮源竟委能自得正傳于語錄章句之外生平尤用力于朱子綱目謂目成于訥齋趙氏之手節刪處頗有脫誤乃以綱爲經以通鑑爲目手抄成書名綱目享成凡數百卷又以元人汪克實徐昭文所著考証考異爲泥于正例而不知有變例往往彈駁多不中肯綮因作二考正數十卷兄弟朝夕相質難又時時與同里閭若璩吳愈輩互相印證饒有精義

吳愈字亦韓山陽人康熙中拔貢生官黟縣教諭生平專務實學明于義利讀書得古人真際其貌肅而溫

和而有節其教人言行而身化之不過責人而學者  
有過惟恐愈知見愈必面熱內慙至不能自容所著  
書闡發儒先不落訓故從遊者皆奉爲家學病革之  
際意思堅定語不及他卒年七十一子寧謨寧謬皆  
諸生有名謨早卒謬能讀父書內行醇備事寡嫂謹  
與人交真質無委曲所著詩古文皆可傳

張鴻焜字越石山陽人郡廩生少孤力學事母以孝聞  
嘗從同里顧謨遊習聞諸經奧義尤殫心學易于本  
義易傳啓蒙諸書靡不貫串嘗取儒先語錄切于日  
用者分類集纂以資警省又著有辨志說理學源流

諸書藏于家

淮安府志卷之二十二

德義小敘

從來風俗之成上與下各操其半古者聖王秉道於上志士修身潔已於下故盜畏王彥方知諸有爭訟曲直者或至塗而反或望廬而還於以助成教化茂美風俗使人人盡若斯其去刑措之世豈遠哉是以聖王重之表厥宅里崇諸緯楔豈徒粉飾太平爲名高實以有裨政治也淮郡自宋迄本朝數十人或捐餉以助軍或埋齒而掩骼或捨地得金而不有或受人寄托而不私能使劫盜服其誠大吏欽其信鳴

呼雖致道不拾遺奚難焉志德義

宋

蔡彥規楚州山陽人官主簿居與徐仲車爲鄰彥規爲  
兒時與兒曹羣行仲車在簾箔間見其氣貌異於羣  
兒意甚念之一日取其所爲文讀之與時輩不類仲  
車外氏在關中自祖父母而下凡八九喪未葬彥規  
官關中卽爲買地謀葬葬有日而彥規病卽以成事  
付其孫正彥規卒於官其守呂公哭之甚哀襄事所  
需盡出于呂

舊志不載見節  
孝先生文集

元

葉公政字克明淮陰人至正甲午公政以浙西幕史轉  
餉鄂閩與丹陽富民束子章善子章將赴汙以貲囊  
相托公政使子章手緘而謹藏之越兩月子章之友  
朱君讓來謁曰子章不幸遇盜死矣昔子章所寄中  
有某物欲啟囊取之公政曰汝寓物子章未嘗語我  
義必質諸其家明以付汝君讓以公政匿爲已有銜  
之去明年旣竣事至丹陽要束朱二氏子父啓緘囊  
得金銀珠鈔衣帛有差歸之束餘有朱題封者歸之  
朱且盛具酒饌以謝之前翰林張復初嘉公政義爲

作傳且稱公政幼知讀書嘗從平章克池破蘭溪賊  
徐真一平蘄水寨司平章凡七薦中書不報

葉公新舊志俱不載事見陶九成輟耕錄今當補  
入德義卷內其父季寔從父蟾心雖皆任宦而事  
寔無考未敢作傳但附見公政傳而已  
有王逢贈公政詩嘗入藝文見文獻志

湯福新字壽之河南杞縣人元初徙居山陽後遷桃源  
赤鯉湖居積甚富淮安府及清河沭陽兩邑公署皆  
所創建邑令賈汝礪以海運糧戶逃追徵不完爲代  
償米五千石淮水泛溢清河以東盡受其害乃募人  
築隄四十里捍之患遂息李羅鳩各縣民開濬邢溝  
故道惟山陽工不就復以米二千石助之天歷間歲

饑賑粥兩淮之民多所全治又濬連沐二水通舟楫  
今名湯家澗以次子遵貴贈奉訓大夫知海甯州事  
長子通官中書省宣事

福新長子通無  
事寔附見父傳

湯遵字伯欽福新次子仕太常禮儀院都事張士誠起  
兵高郵丞相脫脫南征軍餉不繼遵傾貲接濟大軍  
數十萬者三日事聞擢利用監丞遷海甯州知州

湯遵字伯啓福新第四子官沂州兵馬指揮值紅巾軍  
罔淮安中外隔絕二年遵率義兵殺賊復掘地開河  
運米三萬餉之事聞上遣使賜龍衣璽書褒美之陞



屯田判官兼舊職後被誣逮係詔獄時天久旱御史  
買住等白其枉釋之天卽雨由是朝章交薦累除淮  
安路總管不就

按府志但載福新一人其子通遵遲官閩行事皆  
不載清河縣人物志止載福新遵遲又遺通惟桃  
源縣志爲備而事迹又互有不同府志與桃源志  
載福新自杞縣遷桃源赤鯉湖故目爲桃源人清  
河縣志載遵遲家於清河之漁溝又目爲清河人  
桃源志載遵遲爲觀音奴所誣下獄清河縣志又以  
此爲湯遵遲事文獻志則載二人皆爲觀音奴所誣  
害糾紛抵牾未知孰是又攷元史諸不華傳載不  
華入淮安城之東西南三面皆賊惟北門通沐陽  
阻赤鯉湖指揮使魏岳楊遵遲駐兵沐陽淮安倚其  
芻餉楊遵遲常卽是湯遵遲赤鯉湖  
卽遵遲處元史誤湯爲楊耳

明

丁震山陽人自永樂間祖文義迄震五世同居少長雍睦正德間有司上其事詔旌爲義門

王通字文達清河人少有文譽由胄監仕鴻臚寺序班孤介自守不受私餽而助貧拯難之心恒若不及歿于京邸囊無餘資遠近惜之

王仲英清河人輕財好義正統六年輸麥濟人當道上其事旌表

舊志作仲英攷正德志及清河志當作仲英

蔣琮字潤之山陽人成化戊子舉人少孤力學以毛詩教授里中一時及門者如布政沈純副使韋斌同知

高綬郎中王益謙皆同榜中式授仁和訓導敷教在  
寬典山西文衡自聘幣外別無所受二藩方交章論  
薦竟以疾卒于官

朱瑛桃源人正統六年輸粟九百石奉旨旌表

凌盛鹽城人成宏間邑多饑饉出粟助賑先後至八百  
石撫按義之題授七品散官邑又饑民苦馬價難辦  
又出白金二百兩代餉山陽顧太僕誌其墓

從鹽城志補

蘇勤安東人自祖及以來六世同居宗族和睦成化間  
郡守楊景上其事於朝

高隆鹽城人宏治癸亥歲大歉死者相枕籍隆買城東

地數十畝瘞餓死者數千人

夏能鹽城人嘗與一僧爲莫逆交一日僧懷三百金寄能家其徒無知者數月僧暴病死能挈金還其徒僧故封也能壽逾七十子言孫應星相繼登甲科

胡思忠龍源人嘉靖己丑進士歷官辰州知府孝友謙恭出于性成雖處仕宦每戒子弟無干公事惟以節義詩書訓迪後進歿祀鄉賢

相棟山陽人嘉靖戊子舉人幼有大志負奇氣直節值歲饑上荒政書於郡郡施行之拯濟頗衆遇事役之妨民者卽代爲論訴雖觸犯不自危獎善愛才真若

已出有不善者面斥之性篤孝友周人之急不顧計

豐約植梅數株讀書其下人號梅南先生

舊志列相作棟於仕績攷  
先生未出仕合入德義

葛耿宇字聞桃源人嘉靖中曾助兵餉七十萬上嘉其

忠義賜璽書褒美之賜官鴻臚寺少卿

從桃源  
志補

李景其先徽州人家于鹽城嘉靖二年饑民張鑾等倡

亂撫按議勦景單騎安輯之饑民解散賞以金帛冠

帶悉固辭不受

從鹽城  
志補

沈瑩山陽人隆慶中歲歉捐粟五百石以賑饑有碑記

在竹巷玉皇殿子如恒善事父母生平繩趨尺步家

有草廬書可充棟

舊志德義傳不載瑩名子如恒在孝義傳瑩事反附見如恒傳中按出粟五百石賑饑事屬可傳况又有碑記可考乎今按据事實補傳于此如恒孝行未見寔跡但附見瑩傳可也

蔣正山陽人歲貢生萬歷中官順天府霸州學正爲諸生時試輒高等教授鄉里多所成就有故人軍某者身死無以爲家正育其稚子同已子爲廣文攜之任所歸爲之婚知其能自豎立更分財產與之學者稱爲毅齋先生

蔣公雖官廣文按舊志傳中無一語及廣文任內事此當移入德義類中不應列于仕蹟也又舊志不載官子何地考兩朝寔錄備草得之補入

唐之秀山陽人恩貢生萬歷中選肥城縣訓導陞無爲  
州學正家貧親老略無餘資而仰事俯育支吾不缺  
性嗜吟咏寒暑不輟嘗教子弟云作一品官不如作  
一品人不可以彼易此教士有渠度多士化之著有  
語錄行世

杜岐字來儀本延安人商于淮遂家焉輕財好施與人  
多所依活常晨起如廁見遺金數百堅守至暮廉其  
人返之嗣是家益饒年四十無子友人勸納妾弗許  
或贈之婢不受一日於中州道上主一士人家捐金  
拯其急甘以女奉箕箒堅拒之還家後數年間連舉

三子年八十三步履飲食如常人三徵鄉飲賓辭弗  
往當事高其品以榮壽旌之子逢時中萬歷乙酉科  
陝西舉人官湖州通判陞寧波同知人咸謂德厚之  
報云

吳璜字元錫清河人萬歷中歲貢生選涇縣訓導時清  
河以分黃鑿河河成田廢而賦不除草疏千餘言詣  
闕上之竟得豁免陞竟州府學教授年九十五燈下  
猶能作楷書一夕夢左元放來訪遂卒

從清河  
志增

陳鑑山陽人爲人忼爽任俠好義樂施治橋砌路所在  
多有助殮助葬率以爲常有以貧故鬻其妻者鑑見



之損粟代贖俾之完聚衆皆義之

黃遇駙馬琛九世孫幼失父事母以孝聞母以節終募建湖心寺以資冥福友人何相寄金及衣相與子孫俱死妻張氏老病召其侄義檢前寄還之鄉三老白郡守宋統殷旌其門

張東魯山陽人曾還王山遺金二十兩萬曆十三年淮水衝決墳墓掩埋敗棺六十餘具十六年大饑疫施棺施藥不惜重費其餘焚契券修道路尤多善行年九十歿於鄉

鮑越山陽人其先由歙遷淮幼事親孝長而敦睦好義

築隄顧家河路三十里爲橋五以通潦水鑿井建亭  
以息行人凡三圮三修之萬歷四十三年巡按王九  
敘具題建坊旌表

柳洵山陽人好善不倦傾財濟貧每歲終必分餘資餽  
散鄰里歲以爲常人咸德之

劉一鼎字天燭山陽人天啓中庠生志趣高卓勇于爲  
善淮多水患郡西山子諸湖時多異漲乃啓當事築  
三城壩以障之又開解阜洞以時宣洩之皆捐厚貲  
任勞勩卒底于成郡守宋祖舜聘修郡志

許大受山陽庠生妻亡因有子誓不再娶親戚交勸悉

拒不納知府詹士龍以義夫旌之

李寶鹽城人一日五更拾遺金一囊天明有泣于途者

曰昨領官銀三百六十兩醉臥失之寶聞之亟以金

歸其人初寶無子後竟得佳兒

從鹽城志補

劉教寬字宏宇安東人歲貢生天啓中選建德縣訓導  
陞雲和縣知縣時加徵煩急民不堪命朝廷勅有司  
凡言催科碍撫字者卽加以罪寬喟然曰殘民得官  
吾不忍也遂掛官歸所著有四書引蒙詩經臆解無  
逸遺訓藏於家

王世綰字述楚安東人崇禎中諸生明末流賊震淮安

督撫檄安東移民渡河閭邑洵懼無敢直陳其事者  
縉出控當事陳不便狀議遂寢邑賴以安後以增廣  
生薦授鴻臚寺序班四舉鄉飲大賓卒年八十四

李橋字慕春鹽城人有盜入室已被獲笑而遣之至吳  
門見一病者將鬻妻以備棺殮哭別甚哀橋愴然乃

贈金贖婦還其人其人病尋愈夫婦復完

從鹽城志補

王啓運字馭六安東人崇禎己卯舉人博學善書事親  
以孝聞備棺槨施不能殮者拾遺金還其人鄰婦許  
爲里中某逼死鳴之官婦遂獲旌年四十二卒所著  
書有露濤天河唐書諸集行世

舊志列孝義按傳德義事多且有實跡安東志亦不列于孝義卷中移入德義爲是

畢德字文德山陽人與兄文貴同爨五十年一錢尺布不以自私家素豐性喜施予正統初應詔輸粟助邊淮徐水災捐賑二千石他如義井義學義塚造橋施藥贖難婦諸善行甚多翰林學士黃諫謫廣東歿于官載柩歸陝舟阻于淮不能前漕撫王竑以屬德德買地葬之市屋居其妻孥爲之經紀甚備少保高穀稱其寬惠行善如楊洵寶禹鈞平量助喪如李旺郭震時以爲當子玉登天順丁丑進士官曲陽縣知縣有廉名

舊志無畢德名字今見張太史淮人咏淮詩小字  
中不知當日採自何書畢玉見選舉志亦無事寔  
可考今合附德  
傳列德義志中

邱廩字次岡淮安衛人少孤貧不能自存長學貿易於  
市不務嬉戲誠寔不欺由是獲利日豐家隆隆起性  
仁厚見人急必周之一日遇劫將褫其衣廩曰此所  
值幾何某寔不欺汝能信予約某日畀爾金盜亦習  
知廩許之及期廩果袖金往劫感泣而去閱數年復  
遇前劫伏道旁稱謝強要至其家則已改行成良民  
矣累舉鄉大賓卒七十六子俊孫別有傳

戴華字渤海其先歙人遷于淮中萬歷己卯舉人幼聘

金氏女爲婦金故貧女又病暫時華已爲博士弟子  
家事日起妻父托媒氏諷之令別擇偶華不可卒娶  
之生子三時選由貢生官四川東道時遴字上子  
能繼父志篤友誼淮教授陳某陞任雲南以老母幼  
子相托未幾滇亂道梗而陳母死爲之經紀其喪金  
某令四川亦留家累于淮屬善視之金母死亦爲之  
殯斂金死于賊仍致百金屬後令歸其喪其好行義  
多類此

咸默字大成山陽人嘗受業于左懋第明社旣屋江南  
擁立福王懋第奉使北上默是從行兵戈跋涉不避

艱險及懋第死于燕市默復觸冒忌諱殮其骸骨歸之其家一時以張毅甫目之所著有舟車草詩亦清峻拔俗張采吳偉業錢謙益序甚詳

馮一蛟字仲雨山陽人邑諸生明季流寇殘破中原風鶴震驚淮安岌岌不保蛟負經濟才當事要與議城守措糧餉借兵截漕諸大政蛟條畫詳備皆見施行甲申四月淮安議團義兵爲守禦計當事欲結人心給清賑數十萬石事小定卽追呼沓至人心洶洶蛟急上書史閣部可法爲淮民請命遂得豁免邑人德之諸條議書啓具載所著間園十二書中年八十九



卒

周詩字興吾山陽人邑諸生崇禎中邑大饑米價踊貴  
適糴米千石至卽仍以原價糴之并倡率好善者煮  
粥賑饑全活無算嘗買屋得白銀一緡曰此原主所  
產也彼家貧棄產而所失反倍于所得我何忍據爲  
已有急召其人還之卒祀鄉賢

國朝

劉自靖字共位山陽人庠生祖世光父一臨累世仕宦  
靖生當明季盜賊蜂起遂棄舉子業隱居鄉里以詩  
酒自娛淮水暴漲倡義捐貲築堰以障之三城賴以

安堵子昌言孫愈始恢相繼成進士所著有禮記鵠解居易堂詩文集藏于家以子貴贈文林郎

陶恒培字明宇山陽之清江人順治間歲饑培願盡捐貲財以活餓人于杯渡菴設場施粥所費不下數千金存活萬餘人除夕火災延燒數百家培遍以銀米給之施棺助葬冬衣夏茶善行殆不可勝紀初無子逾五十竟生一子

張剛飛字千子鹽城人順治乙未進士授龍泉縣知縣性亢直不善事上官罷歸里居時嘗憤府縣胥吏陵籍百姓力陳其苦于副使張萬春聲淚俱下萬春竦

然盡瘁其弊鄉里感之

張爲法字可傳安東人康熙中歲貢生以父緯死左兵之難絕意仕進不應科舉避跡顏河邨莊力田課讀遠近皆望風景仰時人比之王彥方後以貢授高淳縣學訓導經義治事悉本蘇湖執經問字者屢滿戶外致仕歸卒年八十九

從安東志補

童養成字完一山陽人除夕啓門見遺金百餘兩立門外俟之還其人友人以幼婢贈之知有夫女也徧覓其夫歸之妻田氏亦以孝謹聞

周正綱山陽人好施與棺木纊衣不可勝計錢米丐與

尤無倦容

邱爲國字如盤司徒度之孫登厠見遺金拾而俟其人  
失金者至還之國善古文詞四方求者戶外屨常滿  
梁承祖字振繩其先襄陵人徙于淮遂占籍山陽順治  
中歲貢生博學能文多隱德鼎革後贖取難民數百  
口俾得完聚周給族黨焚積券至二萬餘金教子弟  
以重廉耻嗜讀書爲首務家刻有五經圖解行世  
舊志列承祖于文苑按其遺事有贖難民焚積券  
諸寔惠此當在德義傳中不僅以文學重也因移  
彼入此

虞三省字通湖鹽城人父好施予竭力以承父志順治

問邑屢告饑前後設賑五次出粟千餘石活饑口甚衆有貧民賣女求脫誣獄三省賣耕牛贖還之當事

旌之爲義民

從通志補

孫愈安東人太學生文廟額敝以歲歉衆不能葺愈捐五百金倡修子飛熊亦多方勸募院道旌之

孫岐鳳桃源人曾拾遺金百餘兩候其主還之年饑煮

粥以賑三施義塚善行不可枚舉

從桃源志補

吳會字東樞山陽人康熙中歲貢生績學植行里人奉爲大師鹽城亂友人以無辜被逮禍且不測密謀出之終身不與人言有美婢侍房閨數年後嫁士族其

夫不意其猶處子也每爲人言吳公多隱德云年七十五卒子寧謚別有傳

劉漢中字勃安山陽人康熙中歲貢生選東流縣學訓導未仕家素貧日食飢粥而讀書不輟爲諸生屢冠其曹外家杜氏絕無嗣歲時必往祭其墓戒子孫勿忘及門田生避仇走京師學使者按臨將落其籍出已資曲全之比再試復然田生家有四喪閉空屋中牧豎據其內樞有覆者復稱貸俾速葬妻父王某居鹽城叠遭水患欠官糧莫能辦爲竭修脯代償之及王卒養其幼子女若干人又爲立墓于祖塋側立碑

其上歲時並祀之臨清倪天章流寓淮安僦屋與漢  
中同居暴卒于馬陵經紀其喪且銘其墓收其遺詩  
乞毛奇齡序而傳之倪無後墓近劉氏兆域每春秋  
挈壺榼往奠仍戒子孫遵行之同社郭某死遺寡妻  
弱女無所歸爲廩給之俾其得所然後已卒年八十

一

潘夢桂字千秋山陽人爲人誠寔不欺尤敦篤族誼以  
族譜久不修乃手自整比繩牽絲貫積五年而後成  
繼較刊祖宗詩文集數十卷疾篤時尙搦管不輟又  
以宗子一支遠在滇南使弟某走萬里外訪其昭穆

世系載以入譜宗族皆敬禮之

沈倩字訥之山陽人邑諸生性孝友樂施予凡族之貧者歲有所予有貧而寡者資之以全其節兩友人先後下世遺孤女各爲擇壻備奩具嫁之值歲饑爲粥以食餓者舉鄉飲大賓卒年九十餘子培寬字公準歲貢生銅陵縣訓導孝友任卹不異其父素留意于地方利病遇事敢言嘗爭屯田以一身爲合郡捍蔽弟培誠亦好施予助貧恤孤傾囊不吝兄弟皆八十餘卒

陸志謹字去肆山陽人福建提學求可子居鄉有行誼



招族子之孤貧者衣食之死而爲之置產立嗣捐貲  
置聖廟先賢神主修敬一亭尊經閣及文昌節孝諸  
祠所費累千金子觀字孚若克守先緒率行不怠弟  
志寬字勿弛性孝友慈愛歲饑設廠賑粥所全活者  
無算新安邵某客于淮負人金不贖將死以旅觀相  
托寬爲殯殮如禮償所逋金且資其喪使歸葬淮人  
稱厚德者必首推陸氏

張宏俊字詰士淮安衛人幼負文譽年十四補博士弟  
子員逾冠領鄉薦第二成康熙乙未進士授蘇州府  
學教授後補江甯宏俊爲人介特鮮所附麗兩任學

博誨人惟以誠信爲本歸里後杜門讀書忍饑度日  
不交官府富商大賈罕得見其面易簣時狀惟餘一  
席茵褥皆無

周允良字爾肱山陽人永城令正紀子康熙乙酉夏淫  
雨不止臺山寺路圯古山橋亦壞行人病之允良首  
捐資倡修冬至後沍陰重寒凍餒死者塞路又竭力  
捐絮衣棺槨無數張太史鴻烈爲作紀事以傳之

楊雯字漢倬山陽人太常卿名耀子倣儻好義縣署之  
東有節孝祠祀宋徐仲車先生日久傾圯雯捐重貲  
鼎新之他如魁星閣興文橋郡縣兩庠凡有關於文

明者或修或創無不視如家事碑記皆可覆按

鮑斐英字鳴岐山陽人康熙丁酉舉人官中書少負文  
譽長而留心河防水利之學博觀察澤洪嘗採其說  
八行水金鑑家故貧然慷慨多義舉族有孤女無所  
依育之家長備奩具嫁之友人無居爲之卜宅王某  
以貧死閱數日其父亦死獨力殯殮之又倡義捐金  
以活其妻子其居官日淺未及有所建樹然恂恂退  
謙君子也

李友蘭字爾馨鹽城人諸生康熙十五年邑大水捐米

千餘石設賑賑粥全活無算

從鹽城志補

呂惟鹽城人幼聘高氏女女長得廢疾瘖不能言高欲以長女易之惟不可曰吾初聘幼女得廢疾天也吾娶其姊妹將安歸乎卒如前約

從鹽城志補

吳瀚字碧海清河人歲貢生父鉅有隱德瀚少漸庭訓長而行義于鄉族屬甚繁凡死亡者所欠丁糧皆累及現戶瀚爲置田三百畝入宗祠代爲輸納以紓衆困又以邑子弟多因貧故廢學請于官立義塾延名師教之名曰臨川書院妻周氏有孝行姑樞在堂鄰舍火猝發氏呼號樞前願與俱死人掖之不肯出頃之風反火滅竟得無恙

齊文光字斌侯安東人諸生康熙十一年歲歉賑饑五十餘日嘗與某同賈某指地得白金巨萬讓于光光曰天以賜爾他人可妄染指乎卒堅却之一時皆稱

其義

從安東志補

孫超宗字自超安東人康熙中歲貢生選睢寧縣訓導邑令聘修縣志學宮啓聖祠久積廢獨力鼎建不待助于人所作詩文邑志載之

劉紹祖字克振山陽人雍正中歲貢生孝友淳篤鄉人敬之常掘地得白金兄弟交讓不受悉以與親戚之貧之者兄子爲縣令負官銀累千謁官請代償之不

足更推住屋與之老益好學病不能開卷命子讀書  
整容以聽年七十卒

淮安府志卷之二十二

文苑小敘

曹子桓有言文章經國之大業不朽之盛事三代以上無論已魏晉以降三祖陳思及徐陳應劉之輩俱斌斌然含華載實質有其文雖不逮雅頌要亦一時之雋矣夫文章與時汙隆昌黎文起八代之衰歐陽能革楊劉之弊固當求什一於千百而淮郡以一隅之地若漢枚氏父子之於賦魏陳軍謀之於檄唐吉侍郎趙渭南之於詩宋張文潛之於文莫不擅一代之雄他郡鮮能及之者嗚呼豈不盛哉元明以來稍

不逮要皆聞風而起不可沒矣志文苑

漢

枚乘字叔淮陰人也爲吳王濞郎中吳王初謀爲逆乘  
奏書諫王不納遂去而之梁從孝王遊景帝用鼂錯  
計損削諸侯吳王與六國反以誅錯爲名漢聞之誅  
錯以謝諸侯乘復說吳王王不用卒見禽漢旣平七  
國乘由是知名景帝召拜爲宏農都尉以病免子皋  
字少孺乘旣死武帝詔問乘子無能爲文者後乃得  
皋初乘在梁時取皋母爲小妻乘東歸皋母不肯隨  
分皋數千錢留與母居年十七上書梁共王得召爲



郎三年遇罪室家沒入梟亡至長安上書自陳枚乘  
之子得之大喜召入見待詔詔使賦平樂觀善之  
拜爲郎貴幸比東方朔帝得皇子梟與朔作皇太子  
生賦衛皇后立梟奏賦以戒終從行所至上有所感  
輒使賦之爲文疾受詔卽成故所賦者多凡可讀者  
百二十篇

魏

陳琳字孔璋廣陵射陽人博學能文長於書檄袁紹使  
檄告劉備言曹操失德不堪依附後紹敗歸操操曰  
卿昔爲本初移書但罪狀孤可也乃上及祖父耶琳

謝罪曰矢在弦上不得不發操愛其才不加責以爲  
司空軍謀祭酒管記室軍國書檄多其所作操先苦  
頭風卧讀琳所作翕然而起曰此愈我病徙門下督  
建安二十二年卒

唐

吉中孚楚州山陽人少爲道士後登博學宏詞科授校  
書郎與盧綸韓翃錢起司空曙苗發崔峒耿湓夏侯  
審李端齊以詩名號大歷十才子貞元初與陸贄韋  
執誼吳通元等同視草官至戶部侍郎

唐史無中孚傳雜見吳通元盧綸傳中綸傳韋中  
孚爲鄆陽人吳興先賢傳及全唐詩傳皆同案盧

綸李嘉祐皆有送中孚歸楚州舊隱詩李詩云淮  
上及春歸虛詩云但說淮南樂又云下淮風自急  
則中孚爲楚州人無疑中孚妻張夫人詩尤著名  
今全唐詩傳亦稱張爲楚州人卽中孚可知矣

趙嘏字承祐楚州山陽人會昌二年進士杜紫薇見共  
早秋詩吟咏不已因稱爲趙倚樓又贈以詩曰今代  
風騷將誰登李杜壇爲名流賞異如此宣宗嘗索嘏  
詩首卷題秦皇云徒知六國隨斤斧莫有羣儒定是  
非不悅由是功名不顯每懷歸志嘗有詩曰早晚粗  
酬身事了水邊歸去一閒人終于渭南尉有渭南集  
三卷傳世

宋

張耒字文潛楚州淮陰人幼穎異十三歲能爲文十七  
時作兩闕賦已傳人口遊學於陳學官蘇轍愛之因  
得從軾遊軾稱其文汪洋冲澹有一倡三歎之妙弱  
冠第進士居三館八年顧義自守泊如也在穎聞蘇  
軾訃爲舉哀行服安置於黃晚監南嶽廟主管崇福  
宮卒年六十一建炎初贈集英殿修撰耒儀觀甚偉  
有雄才筆力絕健時二蘇及黃庭堅晁補之輩相繼  
沒耒獨存士人就學者衆分日載酒殺飲食之誨人  
作文以理爲主詩晚歲亦務平淡效白居易體樂府  
效張籍久於投閒家益貧郡守欲爲買田謝不取有

宛邱集七十六卷行世

元

湯炳龍字子文山陽人寄居京口辟慶元市舶提舉學  
問該博善談論四書五經皆有傳註尤深於易詩歌  
甚工晚自號北邨老人所著有北邨集年八十餘卒  
卞思義字宜之楚州人氣字踈曠早年有詩名能苦吟  
對客談詩終日不倦瀾西憲府辟爲掾屬任滿轉建  
德錄判未任庸田制司再辟爲掾史嘗寓陵陽與劉  
有之吳起季王子山吳子彥胡成之輩相唱和上元  
楊嗣稱其詞宏麗華妙可以追陪古之作者惜詩多

失傳

右二人舊志不載見顧嗣立元詩選第三集湯炳龍傳顧亦作丹陽人按州龍寓居京口去丹陽不遠故疑山陽作丹陽然考其題江貫道百牛圖詩云我本山陽田舍叟家有淮南數千畝江南倦客老不歸此田都爲勢家有則其爲山陽人無疑今從顧集補入本志小傳卽以顧本爲據

明

秦約字文仲鹽城人徙居崑山仕元爲崇德教授洪武

初召拜禮部侍郎以親老辭歸再徵爲溧陽教諭有

樵海集

舊志未載從鹽城志補入又鹽志云約舊志無名見朱竹垞詩綜有寄楊鐵崖詩亦高士歟

成寧可字仲謐鹽城人志行高潔工篆隸善吟咏洪武

初以監生授浙江道監察御史陞廣東按察司副使  
陳擇善字從之安東人能詩文洪武十五年以聘赴京  
將官之不受授州佐放還十七年復召授監察御史  
十八年使台州公暇出勸善文示其官民二十年謫  
戍河海卒有漣隱集一帙今失傳

金銑字宗潤山陽人正統辛酉舉人授蘄州知州以文  
學著稱聘典江西文衡擢禮部員外郎充中秘編纂  
官書成陞廣信府知府簡訟獄省刑罰暇則登臨賞  
會嘗自謂公事湖中了未幾乞歸日以詩酒自娛四  
方走幣謁文者無虛日所著有省菴集漫叟日錄

高雲字從龍山陽人成化辛丑進士授行人歷陞南京  
禮部郎中性沉靜寡言笑尤長於詩

芮鎬字廷器山陽人成化中歲貢生仕蒙陰縣訓導學  
行推重一時聘修青州郡志陞魯府紀善纂修寔錄  
輔導忠勤進階修職郎特賜勅命以獎其賢

曾道山陽人少從李崆峒學詩融練渾成氣格高古爲  
淮安詩人之冠惜流傳者寡今存者三詩而已嘗聞  
元陽山人王逢年渡淮困於逆旅徒步往追之資之  
以歸又輯其詩刻之曰海岱集其好事如此時又有  
高永祉者字介夫亦成化間人詩尤工今所存亦少



皆淮詩人之可傳者

蔡昂字衡仲山陽人正德甲戌進士第三人及第除翰林院修撰歷官翰林學士兼詹事府卒贈禮部尚書昂少穎異嗜讀書家貧不能致每假之舊書家一覽卽能成誦領鄉薦第二試南宮對大廷皆登名第三主鄉試者一同考會試者三在史館侍經筵幾三十年宏中雅量而局度嚴整人不敢干以私時方以樞軸期之未究其用而卒

潘沐字敬修弟采字世修山陽人都御史塤子兩人皆好讀書強記工文辭沐善書法從父遊宦所至凡遇

名勝題詠祝告皆其手書勒石采好作駢體文亦麗  
則有體尤有孝行皆不永於年沐年二十九采年二  
十六皆先父卒

吳承恩字汝忠山陽人嘉靖中歲貢生官長興縣縣丞  
英敏博洽凡一時金石碑版輟祝贈送之詞多出其  
手家甚貧又老而無子遺稿多散逸失傳承恩謂文  
自六經以後惟漢魏爲近古詩自三百篇後惟唐人  
爲近古近時作者徒謝朝華而不知畜多識去陳言  
而不知漱芳潤卽欲敷文陳詩難矣官長興時與徐  
子與善沔陽陳玉叔守淮安子與過淮三人呼酒韓

侯祠內酒酣諭詩終日不倦時又有吳萬山者善詩  
及草書玉叔皆折節交之得娑羅樹舊拓本於承恩  
家卽屬萬山雙鉤刻諸石子與常與玉叔書云二吳  
高士咄咄仲舉設榻待之可也萬山名從道沐陽人  
世居山陽

潘萆字孟深山陽人都御史頃孫由監生官膠州府同  
知陞魯府紀善少承家學長于風雅與弟蕃苞皆有  
詩名以祖中丞有盪平青羊山寇功請於朝乞賜祭  
葬許之所著間中草督漕尚書褚鈇爲之序蕃有大  
夢軒集苞有鹿門稿

楊于臣字子世

一作名世

山陽人郡廩生博學多才議論風

發性不耐舉子業故枘鑿當時居恒究心經史更留心經世之務嘗輯淮安府神光兩朝寔錄備草四十一卷五十餘年典故搜羅會萃纖悉無遺後來修志乘者祖之

沈文郁字丕顯山陽人萬歷中郡諸生性善吟咏隱居涇南村舍多集古法書名畫以自娛所著有濬靈齋詩稿南遊小草集唐詩一卷藏於家子傳亦能詩當周延儒復相時舟過淮陰作十詩上之規切時政多中肯綮後所言皆驗

沃士彥字蜚南大河衛人崇禎中歲貢生其先世以武功顯至士彥折節讀書遂成名儒凡經史子集天官地志醫卜種植之書無不讀尤邃于三禮遇典物儀制臺臺辨晰悉有指歸子起龍起鳳皆有名諸生中每試兄弟各冠一軍一以敏一以工士林交稱之起龍中崇禎壬子副榜起鳳乙酉恩貢生會丁變亂遂避跡田間耽情吟咏起龍悵悵先卒有自著年譜燕遊草藏于家起鳳著禮記滙解四十卷史論四十篇論斷精嚴俱發前人所未發

夏曰瑚字膚公山陽人崇禎辛未進士第三人及第授

翰林編修奉命封江川王丰裁疑重餽遺一無所受  
曰瑚少有文譽名噪諸生中及登翰院官禁近人皆  
以大用期之歷官未幾遽移疾歸葺恢台園于湖濱  
日與故人賓客賦詩飲酒其中逾年卒

洪瑋德字握靈山陽人崇禎中貢生選黃巖縣訓導轉  
臨海少遊邑庠與同里邱信之夏塗山楊六餐互以  
文字相雄長及秉鐸浙西居台九載其門人起家甲  
第者皆極一時之選歸老杜門尚日手一編不釋

張致中字性符山陽人崇禎中歲貢生制藝典雅嚴密  
不失前人尺度尤好畋漁百氏詩古文醞釀醇厚衷

然爲一方名宿復社初興致中與里中白受藻方能  
權率同郡諸子應之家雖貧儲藏鼎盃碑版之文頗  
富精于字學辨體審音釐正謬誤尤爲學者宗仰晚  
以經明行修舉未授官而卒子弨弘毅弨最有名

石可璽字泥函大河衛人崇禎中庠生性剛正有節行  
嘗佐當事畫城守計又建議立義社結鄉勇爲戰守  
備甚具及聞京師陷北向痛哭欲傳檄四方爲討賊  
計視勢無可爲竟鬱鬱失志發病死嘗與靳應昇肆  
力爲詩兩人合一集刻之其自序云今之作者未拈  
韻卽思奔突不臣附於瑯琊北地之餘卽爭席於公

安景陵之後嗟乎詩本以位置性情發他人之滕箴而攘之猶名之盜况撻取他人之性情而私爲已有尙得謂之有廉耻乎其自道如此子岱峙華峙

李天定字靜孺山陽人崇禎中邑廩生與兄天經天授同績學有聲每奏一藝士林傳抄殆遍尤篤志彝倫捐潔自愛內修孝養外擅詞壇江南北稱爲淮陰三李子鎧進士別有傳

胡從中字師虞山陽人崇禎壬午舉人入

國朝不復與計偕避迹鄉里頽然自放其詩磅礴縱橫有真氣書法絕類蘇長公頽唐偃側於亂頭粗服中



極饒姿媚長箋短札遍滿人間人皆寶而藏之康熙  
中聘修郡志年八十餘卒

張養重字斗瞻山陽人崇禎中諸生鼎革後不復應試  
與同里靳應昇闕修齡輩結望社日以吟咏相娛樂  
初居新城及戍兵至井邑皆營壘遂失先人之敝廬  
迨河決又喪其土田奉母携妻子隱居白馬湖之濱  
未數年湖復大漲草堂盡沒還奉母入城家計益困  
不得已索米四方北極燕雲南逾瓊海凡忠孝節烈  
登臨憑弔之墟無不見之於詩纏綿悽惻有風人之  
旨子欽世從子鎮世鎮世崇禎中拔貢生亦善詩名

與養重埒閉門高隱父子間自相唱和所著有一家言

閻修齡字再彭山陽人崇禎中領鄉貢改革後遜跡白馬湖濱結蒲菴隱居其中號飲牛叟以見志偕張養重靳應昇諸子聯望社相唱和爲南北詞流所宗風雅之士一時翕集如河濱李楷黃崗杜濬太原傅山南昌王猷定寧都魏禧皆下榻相待不減顧阿瑛玉山雅集之盛于世味泊如也子若璩

從山陽志補

胡奏膚字碩公山陽人崇禎中諸生潛心力學制義醇正善書法楷書學黃庭行草學淳化詩清勁有則尤

工岐黃之學

從山陽志補

潘尊賁字腹老山陽人邑諸生少負異才日誦萬言未  
成童已驚其長老既屢蹶不得志一寄意于詩原本  
經術醞釀深厚足自成家一日友人招遊湖上集四  
方名彥數十人卽席授簡索詩晚更張燈命酒絲竹  
競奏尊賁盡醉賦詩放筆一笑而逝

國朝

嵇宗孟字子震安東人崇禎丙子科舉人順治初仕至  
杭州府知府歷任皆有聲善屬文詞采壯麗下筆千  
言立就詩尤縱橫排奐不可羈鼻康熙中舉博學宏

儒堅以疾辭

舊志在仕績  
從通志改入

湯調鼎字右君清河人世居清江浦順治丁亥進士授

澧州知州二年解組歸少負奇氣文采煥發積書數

千卷夜讀達曙年暮目昏曾不少倦

從清河  
志增

潘取臨字大也山陽人順治甲午舉人戊戌會試副榜

選常熟縣教諭少負文名及老尤多隱行存友人遺

孤除里門巨猾至今人能稱道之子御炳康熙甲午

舉人其文名亦與父相埒

卞爲鯨字友龍山陽人順治甲午舉人少負才名與弟

爲豹俱馳聲庠序中豹早卒鯨懷抱利器巍然爲一

時大師餘膏賸馥沾丐者皆躍冶以去鯨僅以選貢  
領鄉薦而已著述極富有長嘯閣集十一卷行世

靳應昇字璧星山陽人順治中歲貢生博學工文尤長  
于詩與虞山再彭日久倡和一時稱爲三詩人廷試  
至京時輦下諸前輩主持風雅者皆擊節歎賞戊子  
以後故居爲馱馬洩渤之場卜居河北不蔽風雨乃  
益與望社諸子相砥礪詩益高古醇厚刻有渡河集  
孫一致字惟一鹽城人順治戊戌科進士第二人及第  
累官侍讀學士性恬淡嗜學詩宗少陵兼出入王孟  
書法俊逸以母憂歸遂不復出居鄉時布衣徒步與

素交往來旁觀者不知其爲學士也後感風痺臥牀第者十餘載雖伏枕呻吟不廢嘯咏所著有世耕堂

集

從通志補

吳一清字太一山陽人順治丁酉舉人天才曠逸讀書過目不忘制義高古詩古文不輕作學問該洽有問輒答所定古文百篇評論精當後學奉爲典則未仕

卒

從山陽志補

李鎧字公凱山陽人順治辛丑進士任綏縣蓋平二縣皆著循績康熙己未舉博學宏儒歷陞禮部侍郎予告歸鎧少孤力學篤于孝友及授官簿書之暇肆意

讀書博綜羣籍至老彌篤詩尤沖澹融淨如其爲人所著有恪素堂集

張弼字力臣山陽人崇禎中諸生鼎革後棄諸生不就試究心六書之學躬歷焦山水滢手拓瘞鶴銘增多前人數十字又博考詳辨成書一卷入秦謁唐昭陵遍覽從碑諸王公墓碑及六馬圖簀殘璫斷石必拓而藏諸橐闕疑存信皆有根證取鬻產之值爲願處士炎武刻廣韻暨音學五書手寫字樣考覈詳審所著書今皆散佚從子育徵詩賦敏妙

聖祖南巡召試行在官中部縣知縣

馬駿字圖求山陽人康熙己酉舉人天資敏秀潛心問學所作詩澄泓華淨靜氣迎人兼能鼓琴顧曲善行楷書仿漢魏人作小印章無不精好結廬河上兼葭秋水掩映書帙日與諸同社及四方士賦詩飲酒其中晚薦博學宏儒未及試而卒所著有聽山堂集

張新棟字季望山陽人順治庚子副榜貢生幼穎悟絕人日記數千言經史百家無不綜貫詩文不多作作

必期于可傳所著有頤菴集

從山陽志補

張鴻烈字毅文山陽人吏部考工司主事新標子康熙己未舉博學宏儒特授翰林檢討纂修明史疏請開



聖祖南巡特復原職鴻烈才識敏達辭藻豐蔚雖居翰苑不

支河轉漕以避河險時方興殿工採木遠省又疏請  
寬期減數事悉施行吏部以不應密封銜級以憂歸  
僅欲以文章顯疏舉一二畧見施行竟齟齬以去山  
陽自宋嘉定後卽無專志鴻烈創纂山陽縣志五十  
六卷一方典故賴以不墜

劉琨字超宗山陽人康熙中歲貢生選青陽縣訓導少  
與弟瑄齊名爲文章根極理要尤熟于經學辨析疑  
難不遺毫髮晚訓青陽新學宮備俎豆鐫疊以目資  
歸晚精于易八十時猶日誦一卦素留心地方利病

以學宮戟門偏近制府爲武人所移時時率諸生力爭舊制又以澗河久不濬致三城積水不得洩著議萬餘言欲上之當事會老病不果未幾卒

邱象隨字季貞淮安衛人冀寧道副使俊孫子拔貢生康熙己未舉博學宏儒特授翰林檢討纂修明史歷司經局洗馬隨少承家學年十四卽工詩與兄象升有淮南二邱之目性孝友未仕父歿廬墓三年通籍後追承先志積俸置田爲宗祠用族人稱之

從通志補

吳晟字西李山陽人康熙壬戌進士授庶吉士歷左中允雅善詩賦工古文詞纂修實錄政治訓典明史諸

書皆嚴核精確甫踰強仕以父老告終養歸所著有清溪草子泰雍正丙辰進士官翰林院檢討纂修

五朝國史泰爲人沈靜誠實不務爲辭章之學嘗修葺近思錄及朱子節要校勘精當年六十九卒

稽裒字季雯安東人弱冠作黃河賦詞旨豐蔚及長愈側儻豪邁闢小園焚香淪茗日與諸名宿倡和其中偶濡墨作畫筆意蒼潤接跡元四家晴窓斐几展卷含毫一脫稿人輒藏弄之常作河山帶礪圖督漕使者進呈御覽並因欲達其名于上裒力止

之風流蕭散有晉人風度

從安東志補

丁象咸字志諧清河人康熙壬子拔貢生選巢縣教諭

通志作燕湖縣教諭學邃行優推重鄉里尤熟精資治通鑑貫

穿融洽有問古人世系姓名爵里者皆應答如流無

有舛誤

從通志補

汪之藻字薦宮清河人博涉經史盛有文譽編清河縣

志

從通志補

吳水雲字流章山陽人幼讀書善文詞于五音六律之

學別具慧解尤精于琴能自造五音譜凡關睢卷耳

及古白雲謠大風歌易水歌漢唐人樂府陶淵明歸

去來辭無一不可譜入琴者審音察理晰及秋毫不

知授自何人晚隱濠上有移情物外之意

從山陽志補

張坊字表民山陽人父鴻烈坊資稟明慧善讀書年十五補博士弟子員才華清麗嘗作蘭花賦以見志詩尤清逸嘗謂諸兄曰吾于詞賦若有宿慧可不學而能年二十遊金焦詩情益壯父官京師每緘書必附懷親詩年二十三以疾卒

高于雲字漢思山陽人少孤負儁才工詞章善爲駢體文遨遊南北蔚爲名士從子婦蔣氏以女子守貞數十年于雲徧乞詩文表其苦節讀者哀之

從山陽志補

周鱗字喬嶽山陽人康熙中歲貢生兩中丁酉甲子南

北副榜選潛山縣教諭少爲諸生每試輒冠其曹監  
司守令凡以文字相契治者無不以國士推之士之  
負笈從遊者日益衆經其指授輒掇巍科通仕籍而  
鮮終落落無所遇兩中副車老得寒氊一席蒞任才  
浹旬卽卒於官

杜首昌字湘草山陽人嗜讀書不事生產家日益落工  
詩辭善草書風流宏長巍然爲一時聞人結交遍天  
下遊踪所至無不側屣迎者詩宗長慶灑筆立就沖  
和雅適不慣作盤空硬語又喜爲小辭嘗有黃鸝句  
人因以杜黃鸝呼之作字得晉人意所著有杜蘅編

年凡數十卷

徐轉迅字動盈山陽人康熙中歲貢生選全椒縣訓導家貧讀書潛心理學與同里陸提學求可往復論難皆粹然儒先正論所著有黃秋間高卧堂詩集

潘夏字西河山陽人順治中郡諸生不事舉子業專肆力于詩性好酒家貧不能常得興至卽走向友人家索飲醉則以一詩報之愛其詩者召飲無虛日所著漱澹亭詩高妙俊逸無一習見語

阮估字吉人大河衛人崇禎中邑諸生明季徭役繁興隸軍籍者幾無寧字獨能績學植行不殄厥世子晉

字鶴緱順治中由諸生入國學博極羣書屢試京兆  
不偶時 詔開博學鴻儒科津要多欲招致門下稍  
遷就卽可立躋清華顧堅辭不附晚年築室卹居以  
醇謹敦龐爲鄉黨矜式所著有自吟亭詩集

周鴻陽字熒侯鹽城人邑諸生嚮產購異書數百卷評  
點精覈于易經圖說尤能發明爲後學講解不倦善  
書法風骨勁健追配古人同邑薛億性孤介傲俗一  
見遂折節稱弟子亦善書嘗作小楷千文數十本及  
擘窠大書廣輪數尺者能一筆成之惜所著述多散

逸

鹽城

志



劉沁區字水心鹽城人康熙中歲貢生少罹多故于世  
鮮他好惟篤嗜言詩生平尤辦香劉隨州刻隨州集  
以教人晚遊郡城多下榻邱侍講桐園簞燈夜坐把  
酒論文有鍼芥之合因使諸子弟從之遊其所爲詩  
溫柔敦厚一唱三嘆有風人之遺所著有西渚詩存

鹽城  
志

顏敏字不敏鹽城人康熙己丑進士閉戶攻苦寡交遊  
壯歲始補諸生屢不得志于有司有寫懷詩云韞玉  
不堪勞再別爨桐猶喜未全焦聞者壯之晚獲一第  
授廣東南海縣知縣未幾以老病乞歸所著有蕉籬

詩文集

葉峻字嶠山鹽城人康熙中邑諸生性狷潔不妄交與  
嗜古力學搜討舊聞一經過目終身不忘平居議論  
多發前人所未發惜所著述皆散逸失傳

譚述字古菴清河人邑廩生寓居郡城

聖祖南巡行在召試詩賦取入內廷教習時應制賦詩屢

奉溫綸褒獎已選宿州學正復留効用特授侯

官縣知縣以病告歸

邱起元字珠巖淮安衛人康熙中邑諸生少負清譽詩

才敏妙歲乙酉

聖祖南巡召試行在取入內廷供奉纂修佩文齋廣羣芳譜  
方輿路程考略屢蒙賜賚獲立朝班未幾以疾卒

劉永禎字紫函山陽人工部主事愈子康熙中拔貢生  
少刻苦讀書不爲詭遇入太學頡頏六館中有聲期  
滿試吏部獨爲要人所絀乃幡然南歸侍父叔養疴  
家園永禎爲人內行醇備一室之內薰然咸和爲詩  
饒刻削露多悲哀之音好書法日臨蘭亭數過晚年  
多鍵戶靜攝卒年五十六

戴晟字晦夫山陽人康熙中郡諸生嘗師事浙西黃梨  
洲得劉戡山之學歸而廣購異書研窮經史有疑義

輒就質于同里閭徵君若璩辨難往復多得其指歸  
展家事頗裕而布衣糲食與儒素無異篤于師友故  
舊恩意周至蓋人所難能云

邱迴字邇求淮安衛人廩貢生父大理象升叔洗馬象  
隨揚挖風雅主淮南北壇站者數十年迴目濡耳染  
所得既深又同里張養重劉沁區諸老宿皆迭館于  
家及長遊漁洋鈍翁竹垞之門故學術深邃而尤長  
于詩所居桐園積書甚富於漢魏六朝及近代諸家  
詩皆能溯流窮源洞其旨趣每奏一篇必本之性情  
幹以風骨宜興儲水榭序其集曰澄汰立風格苦思

造懸解允爲知言卒年六十九

周雲書字霽侯淮安衛人康熙中歲貢生屢躋棘闈飢  
驅客遊北之燕南之吳越登臨譙會未嘗廢詩初受  
詩于鹽漬劉沁區造其元解及之四方得江山之助  
吐屬雋永不落凡響常究心經世之學卒年六十四  
所著有櫟邨詩集

戴暉字闇士山陽人力學嗜古又肆力于詩與同邑邱  
迴輩師事鹽漬劉沁區延館于家吟詠無虛日與沁  
區校刻劉隨州集自漢魏以迄元明凡名人詩集手  
錄成帙者數百卷兄晟讀書有疑義輒就與辨析一

家自相師友所著有怡齋詩集

程塏字爽林弟嗣立字風衣安東人其先自歙遷于淮  
塏康熙乙酉舉人嗣立廩貢生兩人皆好讀書喜交  
遊塏嘗得淮故家園亭名曲江樓者爲別業聚四方  
能文之士及里中諸彥課業其中磨礱浸潤文日益  
上金壇王耘渠爲評訂曲江樓課藝四方學者爭購  
其文五上春官不第卒嗣立性英敏讀書一過卽通  
知大義少隨兄後與諸老蒼相頡頏皆欽衽歎服母  
卒哀毀骨立旣葬結廬墓側客之從遊者日益衆詩  
文蒼莽疎放風味醇古工行草書善元四家畫徵歌

切脉勾股遁甲無不精到其卒也知與不知皆惜之  
王燦字射九山陽人兩淮巡按熒之孫邑廩生高才博  
學足跡半天下凡所游歷皆見于詩尤善樂府有晉  
魏間意所著有問津堂集滇行草庚戌集耕晦雜草  
楊開泰字彙征山陽人編修開沅弟讀書不務進取口  
咏手披寒暑不輟尤好爲詩與同志唱和無虛日凡  
遊屐所經裒然成帙嘗作論詩五十韵片語品題洞  
中竅會所著有春帆南邨草堂諸集

淮安府志卷之二十二

隱逸小敘

昔夫子論列逸民以夷齊爲稱首他如沮溺丈人聖人與同世稱其爲隱者而論列未嘗及豈非以夷齊爲千古存綱常而諸人但憤時嫉俗抗志長往能隱而不能見與聖人無可不可之致殊軌哉淮郡龔開聖予與陸丞相同幕宋室旣屋側身無所壽馬以自給食斯蓋夷齊之流邈乎弗可攀已下此數十人蘊真高蹈蟬蛻埃塵之中放志江海之上雖非聖人所尚亦異夫浮沉以取世資者乎志隱逸



宋

龔開字聖予淮陰人少嘗與陸秀夫同居廣陵幕府宋世已改多往來故京家益貧故人賓客候問日至坐無几席一子名浚每俯伏榻上就背按紙作唐馬圖風驟霧鬣豪胔蘭筋備盡諸態一持出人輒以數十金易之藉是不饑然竟無所求于人而死志節旣峻儀觀甚偉文章議論愈高古常爲文宋瑞陸君實二傳人以爲類司馬遷班固陳壽以下不及也見桑海遺錄序

張埜鹽城岡門人洞明經史以人才舉本縣直學累召

托疾不起年七十餘卒于家

舊志未載從鹽  
城縣志增人

元

潘思誠山陽人隱於醫至正間以薦授淮安路醫學教授日常坐肆中得市藥錢持入奉母斥其餘擊鮮酤酒會賓客談古今道德豁如也歿後學者追稱之曰古通先生

明

田潤字德潤安東人謙謹和厚制行不苟博通衆藝最精于琴占驗尤無不應隱居教授雖結廬陋巷而門

多長者車轍人皆高之

康熙志不載正德志載鄉彥中通志移入隱逸今從之安東志亦無潤名

陳九經鹽城人理學淵邃耿定向校士江南首拔之趣入鄉間逡巡不赴焦殿撰竝怪問之復以書曰九經家世謹厚自叔斗南登第家風遂衰此非吾叔意人心不一憑藉恣肆有浸漬而不自覺者有識方爲抱恨九經敢助其瀾而揚其波耶學道終身絕意進取耿焦二公益重之

張衣山陽人萬歷中歲貢生嫻古文辭善書法隱居教授不求聞達應貢之後不就廷試與里中二三老友

續古真率會飛觴拈韻以自娛樂年七十二卒

沈天資字世學山陽人初留意用世之學教授生徒經史之暇兼習武備及老不得售遂漸韜晦督學御史李涑前令寶應時嘗從講學至是聞天資尚在諸生中欲廩之天資聞之遂謝諸生不與試

吳安邦號涇南山陽人貌古朴不樂仕進隱居田間性嗜飲酒不治家人生產有三子曰瑰曰璜曰珊皆名諸生甲申除夕招諸子告之曰爾輩知陶靖節乎母汲汲以功名爲重三子唯唯厥後學使者至皆閉戶不出試竟同日落諸生籍安邦年七十沛縣間爾梅

贈之序曰三十年爲孝子十年爲嚴父二十年爲田間老人過此爲人瑞合生平爲酒星可爲寔錄

宋曹字邠臣鹽城人由薦辟授中書舍人鼎革時年甫二十五卽隱居養母詩文書法冠絕一時客遊四方多識遺民故老與寧都魏叔子錢唐胡彥遠尤善舉山林隱逸博學鴻儒俱不就有會秋堂詩文集真草書石刻行世子恭貽字穉恭康熙庚午科舉人鄆陵縣知縣詩字俱有父風

舊志未載從通志及鹽城志補入

王之楨字筠長鹽城人博通經史恢廓有大志明季流

寇縱橫勢將南下與同邑宋曹祁理暨兄子翼武結  
東西義社保障鄉里閭部史可法建聞揚州楨詣軍  
前陳十策遂延入幕內掌機宜文字軍書羽檄皆出  
其手未幾以疾歸里隱居不出有以博學鴻儒薦者  
力辭不赴所著有楚辭纂注太極圖論史局通論朱  
陸異同辨子翼齊有文行

王翼武字文備鹽城人崇禎中諸生甲申後隱居不求  
仕進惟以授徒供甘旨與祁理友善將與締姻而理  
歿家復貧甚翼武終以女妻其遺孤不忍寒意中之  
盟也天資英敏讀書過目不忘所作東湖樵夫賣菜

備孫供奉秦吉了御舟鵬諸詠識者歎爲詩史

右三人舊志未載  
從鹽城志補入

張璵若字伯玉山陽人崇禎中諸生幼起華胄負才氣  
結納遍天下曾以白衣叅某閣部軍事國變後隨舅  
氏郭允觀同日落諸生籍劇名匿跡不復關世事日  
與同社諸子相倡和才氣疎莽有大家風味竟鬱鬱  
以死弟璵若子斯晟俱能詩

張應錫號兼菴山陽人崇禎癸未武進士南都授福建  
南日寨叅將陞潮州叅將不赴棄官歸應錫以武科  
起家而特長于風雅所著六友堂詩集自前明崇禎

乙亥至

國朝康熙乙丑凡五十一年之作編年備載其生平仕止隱見大節以及舟車南北游蹤所至皆歷歷可數歸里後以壇笠裏頭不緇不素時時懷黍離麥秀之悲康熙中聘修郡志

魯顓字靖夫山陽人康熙中邑諸生于書無所不讀尤邃于象山陽明之學于易之互體卦變尤有心解又曰窮經所以致用也故于天文職方師田賦役諸大政口講指畫皆可見之施行然絕意進取不入場屋家甚貧間遊學四方在旅舍或竟日不舉火而意氣



彌壯得家書輟投之火曰徒亂人意耳與里中顧諲  
楊開沅友善諛延之家使訓其子及諛卒于官頗適  
至爲之視含殮經紀一切護其孥歸里開沅官京師  
病不起亦爲之調度後事每日起凝塵滿室敝衣惡  
屨于世味泊如也年五十歲卒所著書多散逸失傳

淮安府志卷之二十二

流寓小敘

春秋有寓公之禮蓋當時諸侯失國播遷其隣國爲  
致僦見於左傳儀禮者可考也後世則不然或少時  
遊學寄寓而其後出身有大名或生平勲績震海內  
而其後謫宦居此或流離避難以來遷或愛其山水  
而留止雖夷險之致殊軌榮悴之途匪一要其人有  
風節行義及文采照耀者則後人引以爲重不然如  
章惇呂惠卿之徒則當時僦屋且不能况欲以汗簡  
牘乎卽此足爲勸戒非徒雪泥鴻爪無關輕重而已

也志流寓

漢

申公事見史記楚元王傳

按楚元王嘗以申公穆生白生爲中大夫既而穆生去申公白生留是三人者皆嘗仕宦于楚矣舊志載穆生于職官載申公于流寓遺自生不載何也考元王王楚其地在薛郡東海彭城三十六縣與淮地無涉詳見楚元王傳三人者皆不宜載但因此地前後皆名爲楚而未審疆域時代分合之蹟故誤收入志今既詳考沿革則人物卽當以此爲限不容少有假借矣

唐

李珣字待價趙郡人客居淮陰舉進士高第累官翰林學士加戶部侍郎屢有獻納帝頗從之進封贊皇縣

男武宗立坐貶宣宗立遷河陽節度使卒謚貞穆

舊志未載珽客居淮陰見唐書本傳通志亦載珽入淮安流寓今依二書補入

南唐

孫魴字伯魚性聰敏好學唐末都官員外郎鄭谷避亂  
淮安魴從之遊盡得其詩歌體法題金山寺詩與張  
祐詩前後並稱一時以爲絕唱南唐烈祖召見授宗  
正郎卒有詩百篇行世

按馬令南唐書及十國春秋有魴傳不著其爲何處人但云鄭谷避亂江淮魴從之遊而已全唐詩傳以魴爲南昌人鄭志載魴爲淮人不知所據何書文獻志削魴不載蓋亦以史無明文不敢妄引也魴非淮人而從鄭谷遊則姑以入之流寓之列猶不失傳疑之意耳

宋

陳瓘字瑩中南劍州沙縣人中甲科歷官左司諫極論  
蔡卞章惇安惇邢恕之罪由是罷黜明年還遷右司  
員外郎兼權給事中崇寧中除名竄遠州稍復宣德  
郎既又安置通州又徙台州五年乃得自便卜居江  
州旋令居南康纔至又移楚州宣和六年卒謚忠肅  
按宋史但云移楚未嘗名爲何官移楚之後不復  
他徙竟卒于楚亦未可知舊志不載于秩官而載  
于流寓以爲遷判楚州遂移家  
焉未知何據當移屬秩官爲是

趙槩字叔平南京虞城人少篤學中進士第歷官吏部  
尚書以太子少師致仕年八十八卒謚曰康靖布衣

時曾居山陽致仕後復東裝載舟順流而下來遊于淮見徐節孝先生贈詩序

郡志載槩入流寓蓋據節孝先生詩序中語以布衣時曾居山陽致仕後復來遊欽公名德故引以爲郡志光耳安東縣志謂槩布衣時在漣水授徒治平二十四年以學士知漣水軍多善政考宋史槩本傳無知漣水軍事不知安東志何據槩果知漣水軍亦當列之秩官名宦不當僅在流寓中矣今仍郡志不載知漣水軍事

馬存字子才鄱陽人寓居楚州慕節孝先生從之遊卒業于其門節孝嘗作淮之水贈之稱爲秀才又曰進士存亦作長淮謠奉答見節孝先生集

嵇大成北海人登進士第仕宋歷監察御史鎮南節度

使龍虎上將軍致仕過漣水愛其土俗遂爲別墅居之因家焉孫安世隸安東

舊志未載名見嵇安傳中  
今按安東縣志補入流寓

明

張毅揚州人居淮郡博學多才尤邃于詩太師英國公張輔奉命征交趾時聞其才召爲行軍掾史章奏露布多出其手班師不受賞歸隱山陽有詩集

李文顯象山人問學該博永樂九年以禮經魁浙省後被誣謫役淮陰平江伯陳瑄延以教子平江侯陳豫太子太保金濂按察使羅銓僉事齊昭皆其門人也

後還鄉被徵至京以疾辭歸成化元年年九十賜冠帶所著有嘿菴集

王國壽春人僑居於淮幾二十年平江伯陳瑄薦其才試翰林少師楊士奇讀其卷大驚薦爲監察御史有能聲

黃琳蘭州人父諫成化初謫廣州通判卒于官樞過淮安時漕運都御史王竑河州人念其道遠官貧留葬山陽遂家焉琳補郡庠生諫故人在朝者薦琳充翰林秀才授中書累官驗封司郎中

方福福建莆田人成化間進士官御史因諫開金礦謫



淮安常盈倉大使遂卜居清江浦子孫占籍山陽代

有爲博士弟子者從山陽志補

楊懋苑平人成化間進士任漕務工部分司有惠政商

民爲立生祠後遂家于清江浦子孫世爲山陽人代

有青衿

從山陽志補山陽志以楊爲浙江人考正德志作順天宛平人

陳治定合肥人平江伯陳瑄裔兄治安襲爵治定以勲

臣子弟官侍衛後居清江浦恭襄祠旁遂占籍焉

從山陽志補

萬壽祺字年少徐州人崇禎庚午舉人避邳徐之亂流

寓山陽初卜居于蔡市橋西山子湖之濱未幾結廬  
清江浦之南邨名隰西草堂鼎革後謝公車不上被  
僧服自稱明志道人沙門慧壽然癩飲食肉則如故  
工詩文善書畫外而琴棋劍槊百工技藝無不通曉  
雖匿跡蓬蒿而一時遺民故老過淮者無不枉道草  
堂流連竟日夕卒殯南邨所著有隰西草堂集

國朝

倪之煌字天章山東臨清人崇禎時父鸞爲總兵官鎮  
宿遷滄桑後客終山陽因家焉爲人坦易簡直不樂  
仕進雅好爲詩意興豪邁出語蒼涼至于酒闌燈炮

觸緒成吟亦復流宕清華濃郁婉麗行輩中不敢以  
武人子目之所居有一草亭凡四方耆宿道淮者無  
不延攬結納唱酬無虛日老而無子遂削髮爲僧客  
死于雲龍山下所著有一草亭集

李長敏大興人順治間進士授蘄水縣知縣補秦甯皆  
能撫字其民入爲中書未幾絕意仕進客遊山陽愛  
淮上土風淳朴遂卜居焉與物無競然諾不欺人亦  
安之其子入淮籍遂爲山陽諸生

從山陽  
志補

蔣楷字荆名吳人性落拓好飲酒客遊淮陰不能歸馬

駿張鴻烈諸人間其善爲詩招與遊憐其貧乃爲構  
屋以居給饔飧費且延譽于衆由是交遊漸廣日以  
詩酒遨遊諸公卿間妻子皆至其父寄漁亦久客京  
師至是迎養於淮終老焉寄漁亦能詩嗜酒過其子  
得酒錢卽閉戶痛飲父子祖孫相酬酢盡歡乃已暇  
則賦詩清麗以則有風人之致晚號天涯布衣有天  
涯集二卷

從山陽

志補

黃銑字民懷號黃眉歙縣人從父兄客遊徐州遂爲蕭  
縣諸生卜居于淮銑爲人和厚直諒工制義兼善爲

詩與人交誠篤不欺人亦不忍欺之居淮數十年自  
士大夫以至耆老兒童無忤者雖值屢空不廢吟咏  
領鄉貢選全椒縣學教諭卒于官子孫皆爲山陽諸  
生所著有梅花軒詩

從山陽

志補

黃紹軫字雲馭歙縣人前副榜貢生事親盡孝值父病  
親侍湯藥衣不解帶明末寇亂山賊四起負父奔走  
遂北至淮居焉

從山陽

志補

王宗德字明菴黃陂人天啓初襲錦衣衛千戶不附魏

瑞落職瑞敗起復錦衣衛指揮同知掌北鎮撫司事  
平反大獄一百四十餘件全活甚衆以子樊巡按兩  
淮有保全城社功鼎革後遂家焉子孫八籍淮郡

程志義程志智祖籍徽州後寓山陽志義候補主事志  
智官至別駕善行彰閭里巷傳誦所修橋梁廟宇以  
及矜孤恤貧等事難以殫述沒世之後其子猶繼之

淮安府志卷之二十二

方外小敘

余觀左傳所載事多怪誕而聖人罕言性命不語怪神凡卜筮前知之事夫子亦嘗言之卽其問禮老聃亦第出於老氏之說而七十子之徒無道者蓋聖道昌而異學熄不欲啓其途以惑亂當世也淮郡袁真君化龍婁道者止啼事甚怪考之晉宋二史俱不載而世艷稱之蓋史係經世之書卽有亦從刪削而志備載一郡之事務欲網羅舊聞蓋所謂其軼見於他說者姑存之以備紀載君子論而不議可也志方外

晉

袁真君不知何許人嘗典淮郡煉藥成丹自服其一袖  
二月以待有緣者遊于漣城過化龍橋見一白鯪昂  
首相迎凡三過之皆然遂擲丹食之鯪化爲龍橋下  
成潭遺一丹于井井水甘冽因名甘泉真君仙去後  
人建祠于井旁今在安東縣

洪施時真君名荷字道陽安東縣人奉仙觀道士依棲  
許真君道成能役使鬼神驅剪邪魅及許真君冲昇  
命荷執策前導

唐



張辭舉進士不第多遊江淮間頗有道術嘗養氣絕粒  
見有鍊爐火藥術者命筆題云爭奈金烏何頭上飛  
不住紅爐漫燒藥玉顏安可駐今年花發枝明年葉  
落樹不如且飲酒朝暮復朝暮人以此奇之嘗剪紙  
蝴蝶數十以氣吹之成列而飛少頃以指收之俄皆  
在掌嘗遊鹽城作詩上邑令令愛其才欲傳其術曰  
明府勲貴家流年少宰劇邑多聲色之好未暇志味  
元奧但作詩以廣其意一日乘醉剪二鶴以水啜之  
化而翔翥曰汝可先去吾卽至矣遂辭邑令去後人  
多傳其上昇江淮間好事者記辭詩極多

陶德純鹽城諸生偶步三官殿見一人卧殿西側面壁  
壁上有一口字其人以口對之德純長跼于前面壁  
者坐而問之德純曰兩口相對得非純陽先生乎其  
人禁使勿言挈之出門至城東樓曰子骨相珊珊異  
日海陵橋上可再相會也遂憑空而去自是德純飄  
然塵外年八十九方午日宴客謂人曰我名籍丹臺  
久矣大笑而逝鹽人異之乃于其人臥處建集仙堂  
朱

婁道者漣水人字守鱉宋建隆元年生有異相左掌中  
一月中指七節稍長出家承天寺不事誦習暑圍爐

寒浴冰衆莫之測能以刀剖腹洗滌腸胃人駭異之  
就決禍福多奇中仁宗初生晝夜啼不止詔天下有  
能止太子啼者以聞道人自言其能索大石方一丈  
浮淮水仰卧石上祝曰逆水登舟到汴梁頃刻而至  
摩太子頂曰莫叫莫叫何似當初莫笑啼卽止上喜  
賜號證因大師仍歸漣水年六十三右脇側臥而化  
知軍疑其詐積薪焚之薪盡衣被不損忽雷雨大作  
薪火皆滅口出白烟自焚百體立盡目睛舌根不壞  
舍利無數邦人葬于赤岸名臥佛岡

劉真君桃源人住崔鎮劉家莊有道行棄家入東嶽廟

焚修數十年未嘗少懈一日蟬蛻廟中葬于廟側勅  
賜爲真君立廟祀之

孫賣魚不知其名嘗賣魚楚州市大暑中遇一道者曰  
汝魚餒矣能飲我酒可使魚活遂以斗酒飲之久與  
談論自是言人禍福輒應宣和中召至京師賜號塵  
隱處士復還楚州靖康初嘗于亳州太清宮號吽大  
哭人莫之喻有竊記其時日者乃汴京陷日也後不  
知所終

徐依稀漣水人自幼慕道入本州上真觀築室獨居扁  
曰九陽洞天初未嘗識字年久得悟隨口成章一日

以詩辭衆曰自少生來好出家清虛冷淡作生涯九  
陽洞本無他事攜杖歸來樂歲華又曰百八年來養  
拙從君朝說暮說今日撒手歸空遍地清風明月遂  
尸解有鶴從空導之邑人嵇安上其事賜諡冲真大  
師

史和尚揚州人幼在行伍中一旦有所悟棄家爲長髮  
僧行市廛間人以得入其門爲利市不語不食惟啖  
菜果而已骨相非常人莫知其壽數晚來漣水有孫  
總制者築菴敬禮之後朝廷聞其名召至京師方被  
恩遇修兩圓寂其徒函其骨以歸剝浮屠埋舊庵

聖僧者不知其所由來乞食市中人有疾病咒之卽愈  
事多前知人呼爲社大聖時安撫使丁某守城僧一  
日左持斧右持釘行擊于市日釘壞我斧人無解者  
踰數日丁果叛去圓寂後州人葬之城西塚如阜今  
呼爲七里墩水旱禱之輒應

元

屠居士名文正山陽人事親至孝至元元年元兵驅至  
開平日久思念其母南望悲泣因禮佛絕葷酒還至  
大都師事華菴滿禪師于慶壽寺滿號之曰居士及  
薨字混一馳書候母母已沒擗踊號痛幾不欲生乃

出資建無量壽菴屋宇像設無不具足一日沐浴更衣有白虹從西南下垂如飛橋微雨洒道居士踟蹰而逝

明

臧古山吳陵人早年慕道闢其體爲道士學正一法居山陽元妙觀晚來漣水召風雨驅病祟甚驗一日告衆吾當去因作頌云清淨一身六十三春漣城夜月歸拜玉宸言訖而逝塋之日其函甚輕啟視之止冠履存焉後人往往於淮泗邳徐間見之御史陳擇善作文祭之

王宗道字景雲安東人蚤歲學尚不問家事一日方獨  
坐忽一道人來長揖就坐景雲見其頽顏漆髮音清  
越異常人與之語畧露風旨曰得非三丰先生乎因  
再拜稱弟子授以導引嚙漱秘術教以步虛洞微之  
詞一日忽失所在遺草履一雙景雲著履尋之相距  
才數百步卒不可及後相值于漢武臨軒之所因謂  
之曰待汝子成名再當相見遂辭去及永樂初子孚  
任給事中太宗問廷臣有見張三丰者乎王達善以  
宗道對卽日遣使召對給全真牒齋御書往覓三丰  
足跡幾遍天下卒不復見



周一清號維東安東人授五雷法驅邪禱雨無不響應  
張真人携至京授中正乙左贊教年七十卒有石坊  
表其墓

水邱秀才楚州人自郡庠歸遇一異人忽有所悟張商  
英招致之而莫知其夜所宿處密伺之見于紫極宮  
倚壁酣睡一日徧辭里巷卒于儀徵後有州兵見于  
蜀始知其尸解云

僧真齋嘉靖時人居西湖最久晚歸鹽城示寂于萬歷  
末斂龕中六十餘載

國朝康熙十二年孫某者見貯龕屋壞恐其崩壓欲火

卷之三  
墓之及啓龕端坐如生念珠巾服整潔如故因亟封之卽其室而加塗堅焉

釋如安字心怡山陽人幼穎異涉獵儒書善鍾王墨妙工聲詩弱冠自祝髮大悲庵師古燈和尚皈禮乾竺究心內典已而遠遊四方禮名山住少室二十年還淮以大小乘定慧等法根引喻習郡守邵元哲更寺額爲通源刑部郎周三錫爲建妙法堂郡守宋祖舜鄉人高登龍爲置常住田齋十方僧忽辟穀五旬擇新秋日端坐示寂面不改色塋於烈女祠西以所著詩文印心諸錄藏于龕

釋原志鹽城人年十五父爲族兄某誣陷死轉徙淮北  
坎塹萬狀後潛歸殺其仇祭父墓而去竄迹遠避祝  
髮爲僧住三峰徑山靈隱諸刹世所稱碩揆和尚者  
是也

國朝

釋大依字南安閩人初卓錫金陵攝山之棲霞寺後來  
山陽住湖心寺之倚舟堂復居清江之檀度寺餅鉢  
所至士夫莫不願從之遊不妄作拈麈豈拂麈語與  
會所至觸景吟詩托風旨于音響之外直當與鐔津  
石門諸老並傳不僅以雕繪爲能事也所著集甚夥

皆刻以行世弟子柴邨名傳遐結廬邨墅名樹下居  
詩類其師尤善書筆意蒼潤得元四家意

釋傳悟號雪莊山陽河北里人幼事南安老人詩畫與  
童求柴邨齊名聞黃山之勝因往遊焉遍歷前後海  
值雪大作七日不止高處厚十餘尺空山無人偃卧  
土神祠中山下衆僧掃徑出之得不死因卽其地剝  
木皮結棚以居遠近聞而異之爭致薪米爲構精舍  
不處終棲皮棚中人因號爲皮棚和尚康熙中

上聞而召之至京終日酣睡與人不交一言諸貴臣往  
見皆以睡辭問其長曰善睡衆嗤之逾月未召對仍

放還山

釋祖琴字古音山陽人幼參玉林宏覺繼起具德諸禪  
老性孤冷不耐叢林事竟遁跡焦山二十餘年汲水  
拾薪手自供給每當江聲山色風月清曠時卽拾敗  
葉爲詩清類孤篋不涉支那撰述習氣遺稿一帙其  
孫鐵夫刻之鐵夫名元立亦淮人所著有耕烟詩鈔  
一卷

釋萬清山陽人俗姓唐氏初爲誕登寺住持康熙四十  
四年

聖祖仁皇帝南巡

詔至揚州高韻寺應制和

御製詩 欽賜誕登寺匾額 御書果結菩提樹池分阿耨

泉對聯雍正十一年

世宗憲皇帝 特詔進京於 圓明園引 見 賜紫衣

宸翰字幅對聯福字並 命修誕登寺

勅建皖城投子寺卽

命爲投子中興住持乾隆元年奉

旨諭河院高公斌安徽巡撫趙公國麟同送入寺

釋宏範聞思寺僧寺本名大悲庵康熙四十四年

聖祖南巡宏範率衆僧恭迎

改今額範謝 恩詩云野納承 恩對大廷驚箋捧出燦

瑤星綸音 勅賜聞思寺官錦包函般若經一辦好  
香酌

聖德千秋隆遇感仙靈唐虞至澤深如海永鎮長淮萬古寧

淮安府志卷之二十二

方技小敘

前史有言凡占步卜相醫巧皆技也此亦悟之天非學習所致歷代傳扁鵲倉公華佗之於醫李淳風之占步袁天綱之相皆藝術通靈有類前知殆數百世而難一見淮郡以一隅之地而徐秋夫以醫顯衛朴以推算名秋夫針鬼事甚怪見南史張邵傳李延壽作史好述異聞頗類荒唐至衛朴撰歷於春秋日食三十六一行算最密不過得二十七朴乃得三十五此實於經學有裨非猶夫詭怪以炫世者比也他如



繪畫之事亦以類附見志方伎

宋

徐秋夫晉濮陽太守熙子工道術仕至射陽令嘗夜有  
鬼呻聲甚淒愴秋夫問何須答言某患腰痛死雖爲  
鬼痛尤難忍請療之秋夫曰云何厝法鬼請爲芻人  
按孔穴針之秋夫如言爲灸四處又針肩井三處設  
祭埋之明日見一人謝恩忽然不見當世伏其通靈

此事見南史張邵傳言邵與東海徐文伯善文伯  
濮陽太守熙曾孫熙生秋夫秋夫乃文伯之祖文  
伯稱東海人則秋夫亦宜爲東海人鹽城舊志及  
江南通志俱以秋夫爲鹽城人秋夫曾爲射陽令  
非鹽城人也然通志所載與南史少異通志云鬼  
曰身是斜律斯離死患腰痛問君善醫求逐拔秋

夫云汝鬼術何從施目以草東形呼我名治之如其言設祭埋之夜聞鬼來謝云疾已愈通志所引不知又出何書東海鹽城相去不遠或別有據亦未可知此事本屬荒唐留以增異聞可也不必深辨

宋

衛朴楚州人病瞽居北辰鎮一神祠中精算數布算滿案以手略撫之人有竊取其一算者更撫卽覺言人休咎亦屢中春秋日食三十六諸歷通驗密者不過得二十六惟一得二十七朴乃得三十五能不用算推古今日月食但口誦乘除俱不差熙寧中撰奉元歷以無候簿未能盡其術自言得其六七而已然

已寄于他歷

廉布字宣仲山陽人自號射澤老農畫山水尤工枯木

叢竹師蘇軾而得其神官至武學博士

從通志增

元

趙清澗淮人工畫人物士女

從通志增

王谷得黃白術變瓦礫泥土立成黃金一日死于淮陰

范陽公曰王十五兄不死後果有人于湘潭間見之

已變姓名矣

王璧自稱九華山人洞曉陰陽術數明末游山陽賣卜

于市嘗曰天下且大亂能從吾術者兵戈不能加其

身人未之信也後挈家旅食彭城流寇破城壁按遁  
甲法從亂軍中出賊不能害復返山陽以郭璞葬法  
爲人家占休咎指示趨避士大夫皆敬信之後買田

下相終老其間

從山陽志補

山陽縣志以王壁入流寓按壁不過暫遊山陽非  
于此終老未可以爲流寓也如舊志中湯來賀傳  
山及山陽志中陳洪綬顧炎武杜濬嵇永仁潘耒  
諸人皆是茲槩不錄壁操術甚工在淮亦久列之  
藝術可以傳矣

李應光字思泉山陽人性純厚精于醫醫故金竹李氏  
世業久有名濠泗間至應光其術益精活人無算往  
往不受謝淮人重之子潤民官平遠縣知縣別有傳